

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoao: Nafatali Falealii, FS
Teutupe: Fiasili Puni E. Haleck, TK



Ekalesia Fa'apotopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: www.efkasonline.org

Ofisa a le Failautusi Aoao, EFKAS

Aperila 24, 2020

Susuga i Toeaiina ma Fa'afeagaiga,
Mamalu i Komiti Tumau ma Mafutaga Lagolago,
Mamalu i Matagaluega ma Pulega,
Paia i 'Aulotu EFKAS

FA'AALIGA FA'ALAU'ITELE #3 MO LE EFKAS ONA O LE CORONAVIRUS (COVID19)

Susuga e,

I le suafa manumalo a lo tatou Alii Toetu, e toe fa'atalofa ma ofo alofa atu ai i le mamalu o le Ekalesia Aoao; susuga i Toeaiina ma Fa'afeagaiga ma o outou Faletua, susuga i Faifeau ma A'oa'o ma o outou Faletua, o afioga i Tiakono, o Tamā ma Tinā matutua, e o' lava i ulugalii, o tupulaga talavou, fa'apea fanau. E ofo alofa atu foi i le paia maua i Komiti Tumau ma Mafutaga Lagolago, le mamalu i le nofo i Matagaluega ma Pulega, tainane le paia lasilasi o 'aulotu ma Ekalesia uma a le EFKAS o loo galulue punoua'i mo le Atua i soo se tafa o lenei lalolagi. Lagi e mamā ma le soifua maua i le alofa o le Atua!

E ui na ufitia pea i tatou i le ataata o le fa'ama'i o le coronavirus, ae talitonu le manatu, o loo fa'amapu'e pea fa'amalama o le lagi lo outou soifua ma si o tatou ola, i le alofa ma le agalelei lē mavae o le Atua.

I le ava tele ma le fa'aaloalo e tatau ai, e tu'uina atu ai le lona tolu nei o fa'aaliga fa'alau'itele mo 'aulotu uma o le EFKAS. O le upu moni lava, ua le toe faigofie lenei vaitau ua tatou i ai, aemaise mo le Ekalesia ma lana galuega tala'i. Ua suia le gasologa masani o le soifuga. Ua oia foi le soifua tapua'i ma le ola tautua o tagata lotu ona o lenei fa'ama'i mata'utia, aemaise o tulafono e nofo puipua mai ai. Ona o lea, ua finagalo le Ta'ita'ifono ma le Laulauafono, fa'atasi ai ma le Komiti o Tamā a le Ekalesia i Samoa nei, e tu'uina atu lenei fa'aaliga ina ia fai ma ta'iala e fa'atonutonu folau ai le Ekalesia Aoao i lona aga'i i luma, i lenei vaitau lē faigofie. O fa'atonuga ia o lenei fa'aaliga:

1. Tolopō le Fono Tele XXXIII se'i aulia Iulai 2021:

Talu ai o loo malosi pea le pipisi o le coronavirus i le tele o atunuu o le lalolagi, ma, e le o mailoa se taimi e ono fo'ia ai, ua finagalo le Ta'ita'ifono ma le Laulauafono, e tolopō le Fono Tele XXXIII sa fuafua mo Iulai 2020, se'i aulia Iulai 2021 ona fa'ataunuu lea. E maua lava i le manatu le saogalemu ma le nofo puipua o tagata lotu uma mai i lenei fa'ama'i mata'utia.

2. O Faiga Taulaga mo lenei tausaga:

E toe fa'amanatu atu faiga Taulaga o lenei tausaga ia fa'aoo mai i le Ofisa Tutotonu a o lei mae'a le masina o Me 2020. E mana'omia ona vave fa'amaopoopo lea fa'amoemoe, ina ia fuafua ma galulue ai le Komiti o Tupe i se paketi fa'aopoopo mo lenei tausaga fa'aletupe ua tolopō ai le Fono Tele.

3. Ia fa'amaopoopo pea le "Matagaluega Nite" mo lenei tausaga:

E ui na tolopō le Fono Tele, ae fautuaina Matagaluega ta'itasi ina ia fa'amaopoopo pea tulaga e pei ona masani ai le "Matagaluega Nite" mo lenei tausaga, ma ia faao' mai i le Ofisa Tutotonu ae lei mae'a le masina o Iulai 2020. O le isi lea porokalama masani e fa'amoemoe ai galuega fa'atino a le Ekalesia.

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoao: Nafatali Falealii, FS
Teutupe: Fiasili Puni E. Haleck, TK



Ekalesia Fa'apopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: www.efkasonline.org

4. Aloa'ia ma fa'ataunuu pea le Penisione a le 'Aufaigaluega i lenei tausaga:

E ui na tolopo le Fono Tele, ae ua finagalo le Komiti a le 'Au Toeaina ina ia aloa'ia pea ma fa'ataunuu pea le penisione i lenei tausaga, mo le 'aufaigaluega galulue ua atoa le 70 tausaga o le soifua. E tusa ai ma i'ugafono tumau a le 'Au Toeaina, e tatau ona o'atu i le ulua'i Aso Sa o le masina o Setema, ua fa'amavae ma malolo le faigaluega penisione mai le 'aulotu o loo galue ai. Ua i ai foi le fa'amoemoe, o le Fono Tele XXXIII lea ua faatulaga mo Iulai 2021, o le a patipatia ai ma fa'amanatu ai e le Ekalesia Aoao le soifua auuina o le 'aufaigaluega malolo manumalo, o le a penisione i lenei tausaga.

5. Fa'ataunuu pea fonotaga a Komiti Tumau ma Mafutaga Lagolago:

E fa'ataunuu pea le fonotaga a le Komiti a le 'Au Toeaina ia Iulai 2020. Ae afai o i ai se isi Komiti poo se Mafutaga e finagalo e fonotaga i lea lava masina, ia vave fa'ailoa mai i le Ofisa Tutotonu ina ia fa'alauiloa ma fa'asalalau. Afai e le mafai ona saofia mai sui o Komiti/Mafutaga mai i fafo, o le a taumafai le Ofisa Tutotonu e fa'atulaga ni fesootaiga fa'anei ona po, ina ia mafai ona 'auai mai i fonotaga i luga o le upega tafailagi.

6. Fa'auuga a le Aoga Mauauga i Kanana Fou:

O Iuni 11, 2020, e fa'ataunuu ai le fa'auuga a le Aoga Mauauga i Kanana Fou. O le fa'atinoga o le fa'auuga, o le a taoto atu i le susuga i le Pule Aoga ma le 'Aiga o Faiaoga, ina ia usita'ia tulafono mo le nofo puipua mai le fa'ama'i o le coronavirus e pei ona poloa'i e le faigamalo o Amerika Samoa.

7. Fa'auuga a le Seminare Fa'afaifeau i Kanana Fou:

E fa'ataunuu pea le fa'auuga a le Seminare Fa'afaifeau i Kanana Fou ia Iulai 11, 2020. O le fa'atinoga foi o le fa'auuga, o le a taoto atu i le susuga i le Peresitene ma le 'Aiga o Faiaoga, ina ia usita'ia tulafono mo le nofo puipua mai le fa'ama'i o le coronavirus e pei ona poloa'i e le faigamalo o Amerika Samoa.

8. Ta'utinoga mo A'oa'o Ulufale i le Seminare i Kanana Fou:

E fa'ataunuu pea le ta'utinoga a A'oa'o ulufale mo le Seminare i Kanana Fou, e fuafua mo Iulai 13, 2020. Afai e le saofia mai A'oa'o ulufale mai i Matagaluega i fafo, o le a taumafai le Ofisa Tutotonu e fa'atulaga ni fesootaiga fa'anei ona po, e fa'ataunuu ai lenei fa'amoemoe i luga o le upega tafailagi.

9. Ta'utinoga ma le Fa'auuga o le tofi Faifeau Samoa (FS):

Mo ē sa fuafua e fa'auuina le tofi Faifeau Samoa i lenei tausaga, ia fa'aoo mai a outou ta'utinoga tusitusia i le Ofisa Tutotonu ae lei mae'a le masina o Iuni 2020. Silasila i luga o le website a le Ekalesia (<https://efkasonline.org>), o le a fa'ailo atu ai tulaga uma e mana'omia mo lea fa'amoemoe. A mae'a le iloiloa o ta'utinoga o le a feagai ma le Komiti Galue a le 'Au Toeaina, ona taoto atu lea i Toeaiina o Matagaluega e fa'auuina tofi Faifeau Samoa, i se taimi talafeagai e fonotaga ai le Matagaluega. O sui mai i Matagaluega i fafo e le saofia mai i le ta'utinoga, o le a taumafai le Ofisa Tutotonu e fa'atulaga ni fesootaiga fa'anei ona po, e fesootai mai ai i luga o le upega tafailagi.

10. Fa'agafua pemeni FT03:29 mo le 3 masina:

O le tapunia o malumalu tapua'i mo le puipua o tagata lotu mai le fa'ama'i, ua faigata ai i 'aulotu ona fa'amaopoopo le tamaoiga sa masani ona fa'alagolago ai mo lona atina'e. Ona o lea, ua manatu le Laulauafono, o 'aulotu uma o loo 'auai i le porokalama fesoasoani a le Ekalesia, FT03:29, o le a fa'agafua a outou pemeni mo masina e 3, e amata i le masina o Me 2020. O lona uiga, e tatau ona o'atu i le masina o Aokuso 2020, ua toe fa'auuina a outou pemeni e pei ona masina ai.

Ta'ita'i-Fono: Fa'aeteete Saifoloi, FT
Sui Ta'itai-Fono: Dr. Leatulagi Fa'alevao, FT
Failautusi Aoa: Nafatali Falealii, FS
Teutupe: Fiasili Puni E. Haleck, TK



Ekalesia Fa'apopotoga Kerisiano Amerika Samoa
Pusa Meli 1537 – 1 Kanana Fou Street
Pago Pago, Amerika Samoa 96799
Tel. (684) 699-9810 Fax: (684) 699-1898
imeli: nfalealii@efkasonline.org
upega-tafailagi: www.efkasonline.org

Pau ia o nai fa'atonuga, mo le taimi nei, sa fia tu'uina atu e ala i lenei fa'aaliga. Ae momoli atu le fa'afetai tele, Ekalesia e, i lou onosa'i ma lou lava papale i lenei vaitau lē faigofie e pei ona tatou i ai. Tatou tatalo pea i le Atua e aumai le lototele, e fa'amalosi 'au ma fa'aupegaina ai i tatou e galulue ai ma le fiafia i lana galuega, a o fa'amalumu mai pea le ataata o lenei fa'ama'i faigata. Ia agalelei le Atua ma puipui malu lou soifua ma si o matou ola.

Alofaaga e le uma,


Nafatali Falealii FS
Failautusi Aoa EFKAS